


Heedi gwaa handikimu haa gwaa khorongimu: Willem de Vink

Yeesu Masiiya

Yeesu Ilabu'umiisay gu khoroo sliimaa




MALA NA



/aafaraa: Ti idadu goõ gu hhoi, hhaã Iliitleemu gi slaiye hadisa sa hida hhaka'a goó yondiidee gimba gi slaiye ina.

/imbaraa: Ti /imbaraa Iliitleemu gimbaka'ay giyaa hiifadidi gi yondiidi.



Bibiliyaa: Bibiliyaage hiidahhasida somaa, idoo Iliitleemu giyoó iliikhu'une hida haa idoo giyoó iliiyondiidiye sa inay.

Firoo: Coco'omoo haa Iliitleemu, hari qabidinoo baku hari afoo, tay gu toogaa itatiimisida ina.



Ibinaa da koraraa haa koraraa goóba hiifaakoo: Ibinaa da Yeesu Iliitleemu pahha idoo giyaa iliitaarimi. Kaba/a da gwaa'araa haa hiifaakoo see hhaka.

Ilagaasa: Sirakoomiisee da Yeesu yoó hiislaslayda gwaa'araa dosi haa slafaraa hari amoo da /agoo mukaatimoo haa kitahhu difaay.



Ilamooyiru: Iliitleemu yoó ilamooyina, gimati hhaku heedi guraa hiiboo/u. Iliitleemu yoó ilamooyina bere gu lou, ugu hangii fookiti daqa dosii tlakwaroogo haa sla'ada hiifookida. Ilamooyiru wana, sa gimba Yeesu yaa hiiyo /agitiru goori garaa hiiboo/ani dandiray loi.



Ki/araa: Kila idoo hii/abayda qatlay Yeesu gimaa iliiki/ie khorotii. Raw haa khoroo digimaa hiifooki ha Iliitleemu.



Malayika: Ti ya/abimiisay gu Iliitleemu doóba arimaa.

Masiya: Mutemi 'Daa Maakhi Du/iya.' Masiya (ti gimba gu Eburaanisoo) daa ilakeesi hari gimba gu Yunaanisoo na Kristu.

Musalaaba: Khaimoo gu iliilaba'asu, hii daa ilii tluhhumisi Yeesu hari /imba da muuna gosi loi. Ti amoo da laqaru daqa sirakoomiisee dosi goõ da Yeesu.

Mutemi: Sirakoomiisay gu Yeesu.

Muuna daa Tlinti'isi: Muuna gu Iliitleemu hii gu sla'a ibinaa wa'ay gu hida goó sirakomamidee Yeesu.

Nanku Iliitleemu: Uma gu Yeesu. Ti Iliitleemu gwaa khawu khorotii heedi pahha, Nanku Iliitleemu loi.

Pasaaka: Ti losona gu slafaraa da Yeesu aysago. Hari hiica/amuu kosi, losonakee yaati losona gu hiislawaraa afigweeda da Waisraeeli hapee da Misirigo. Losonakee dugwaati eteedidina slime na Pasaaka.

Sataanimoo: Ti fa/aymoo gu Iliitleemu haa fa/aymoo gu hida doóba arimaa hari ilaa. (Slime duguti khui na Biriisimoo).

Slafaraa: Yeesu yaati slafi aysago. Baloo waka hida goó digimaa slafisi aysasugo. Da hhe'esi, Iliitleemu himaa hukuna kila heedi.

Tawaaloo da Iliitleemu: Tawaaloo da Iliitleemu wanta daqata'ay hida giyoó iliiakhamisiyee Iliitleemu.

Tlakwaroo: Ti gimba goó yondiidane goó kanimisa sla'amuu gu Iliitleemu, gimba goó tlaatlahhamisa dandiray, ma daani ilakhuukhu'usa da Iliitleemuge gi kone sa dandiray.

Yeesu: Uma gu Nanku Iliitleemu, ma'aana dosi, 'Iliitleemu yoó ilabu'una.'



YEESU MASIYA NA MIYAA?

Yeesu yaa ibiidi koraraa elefu cada (2,000) gwaa hiicatee taqaaqay hhapee da Israaelige. Inay goóti eteedinay 'Yeesu Masiya' baku 'Yeesu Kristo.' Ma'aana dosi na Mutemi. Ti mutemi kilesiiba. Yeesu dugoóti eteedina 'Nanku Iliitleemu' haa slime 'Nanku Heedi.' Ma'aana dosi tuba, ina ti Iliitleemu haa heedi. Catimisu gu Yeesu dugwaa ilakeesi Bibiliyaage. Balalu sliimaa ti catimisu gu didiru.

QATLAY GU YEESU


Qatlay goori yaati tlaateesi hari hiidawaraa da Yeesu. Hida yaati hhiyuudiri hari ye'eroo baku hari daqwaai, gamiyaa baku hari faraasi. Daqemoo gu deni gu Ulaaya, Ilacindoo gu rawaa gu tla/aã, haa bara da goraa da Afriika yaati konta tawaaloo da Ruumi. Hida wa/a yaa hhidinay somaa haa handikaa. Teesaaqay see, Wayahuudi hhapee da Israaelige yaa hiidahhasiri somaa haa handikaa. Inay digaati eteedi na 'Hida gu Kitaabuu'.

Iliitleemu giimaamisi Kitaabuuge, Bibiliyaage. Ina na Tlehhidiisay gu kila idoo haa ti slai daakeerimoo gu kila heedi tlehhida. Yeesu yaa laqami gimbaki harii tlaa'asa hari khisla.





ISRAEELI QATLAY GU YEESU



Yaamu gu didiri: Yerusaleemu

Yaamu: Galilaaya, Samariyaa, Yudaaya.

Hiitlakhwaruū gosi: Kilomiita da bareemoo cigahha elefu mibeeri cada haa gweleti taqaaqay (28,000).


Hhapee idoo gi iliiwante (caaqwa da yaamu): Nusuu gu yaamu konaaiiba tlawa da didiri.

Siyaasa: Tlaatleesi kori gu mibeeri laho'lo haa tami (63) daa ilikahhiye Kristo, Waisraeeli digaa tawaalimi ha Waruumi.

Sirikariinii: Gafana gu Ruumi, Pontiyoo Pilaato, yaa tawaalimi Israeeli. Tibeeriyoo, Kaysaari gu Ruumi, giyaa tawaalimi.

Diini: Uyahuudi. Wayahuudi yaa konqy Mara gu didiru Yerusaleemuge. Hhpalooee yoó yondiidiyay kila yondu gu diini haa inay ti maarimamaa (Mafarisaayo pahha) hhaã goó ilakesidee sa hida caacaahhamisu gu Bibiliyaa.

Gimba giyoó cocoiyee: Eburaanaisoo (gimba gu Wayahuudi), Yunaanaisoo (gimba gu Wayunaani), Kilaatiini (Gimba gu Waruumi).



Hida hanki gonkoinaa sīi so'oy hiikurunkuridiri duuduge?



Fookidaaruu tlakwaroogo daqa Iliitleemuge, Tawaaloo da rawaa gu raw yaani daadausidi.



Fookidaaruu tlakwaroogo tlaatleesa ibinaa da /abi.



Inkoo see, kiraara dagaā hhe'esi, daganii qaasi kibeeri gu khaige!



Khai sliimaa gooba boo/araa /aamu gu hhou, digi tlaaqi haa digii kwakwahhi aslaage!



Raqatira da hida gugi maasidi tuba, Inkoo, hati malee laqana? Angamalee dandiray see dandi tlaaqi. Miyaa nii dahhasi ibinaa, ibidinaa da hhoi?

Gu lou! Hhaku heedi gu hii/ipa hukumuu gu Iliitleemu. Teesaaqay see, aluū koaa yaa khay hika'a gu hiifooka ibinaa dooguna.



Inay giyaa ilii kakaaniri tlakwaroo dooina, Yohaana gigii nunqudimisi duudu gu Yoridaanige.





Inkoo, laqama /aamu gu laqama hiifookida dooguna tlakwaroogo daqa Iliitleemuge.

Balalu hhakeesii Yohaana Hiinunqudimiisay yaa hiica/i kongoqomee da Yudaayage.

Gu lou, ana hanguri ma'ay kilesi hiinunqudimisa, ma laqantiri handii fookitiri daqa Iliitleemuge tlakwaroo doogunaa. Inkoo, ina gwaa khoca aluū koaa, kona /uuru hari khisla koy see ba/i. Ina hiinunqudimisi unkuray hari Muuna gu Iliitleemu haa hari aslaa.




Haa qariqaaqari...



Ana na sla'a, ugu kwanda hani nunqudiside.




/imbi teesaaqay laqaraa inkoo, sa gimba dandiraatii boo/i hiigaasa gimba sliimaa da slaiye Iliitleemu.



Taataa, tawaaloo doogu yaa khayde daqa doorii, sla'amu koku digii gaasiye.




Kara afoo yaagii ca/adi rawaa gu rawgo



Gu lou, ugu na Nankoy ga slae haa hanoóti muunaboo/eesida ana.

Yohaana Hiinunqudimiisay hiti boo/ii/imisi amoo sa Waisraeeli sa khawaraa da Masiyya. Qatlaykii, hhapee da Israeeli ti daqa da coko/i kilesi tawaaloo da didirige da mutemi gu didiru Kaysaari Aguusito gu hhapee da Ruumi.



Wayahuudi hhapee da Israeelige hingaatii akhasiri tuba, konaiiba /uuru haa digoóti ilahufidi. Hida goóti khu'unay hari kwayru, qatlay Masiyya gimaa iliikhaye. Masiyyaki na Ilabu'umiisay, hii khaymuu gosi daa hiifadidi Handikaa da kitaababaa da Wayahuudige. Ina hii/atlisi haaki...



Duudu gu Yoridaanige Yohaana Hiinunqudimiisay yaa laqami Yeesu hari dinca.

Yu'udaa! Hii na /ambeenimoo gu Iliitleemu gu hiiowa tlakwaroo da kooroo.



Qatlay Yeesu dugwaa ilii hhe'esi hiinunqudisa, te'esaa dugurigi giyaadi ha Muuna gu Iliitleemu kongoqomege.




Ina gi may /agoo balalu mibeeri cigahha tleemaa haa amasi, ma firirimi Iliitleemu sa baraslawaraa yondu gosi.



Yeesu ma hiidahhasi, ina kwanda gi laqane sa kooroo idoo da slaiye Iliitleemu. Iliitleemu ti slai tuba, hida digima hiica/asi hukumuu gu gwaa'araago.

Yeesu dugugi koimisi ha Sataanimoo, hii goó tawaalima hhantee dugugi may arimaa. Slime, ina noó tawaalina kooroo hari amoo da gwaa'araa haa tlakwaroo.



Gu lou, Taataa! Ana yondiida gimba ga sla'ade ugu.



Teesaaqay see, Biriisimoo kanimiisay gu Yeesu, gi koisi hadisa sa Yeesu ilahudaa gu tlakwi, ma may yondiida yondu gu Iliitleemu.

Bere ugu ti Nanku Iliitleemu, ilafahhe tle/eë hhanki, ma mukaatee tleehhidiri.

Suti! Daa handikimi, Handikaa da Iliitleemuge tuba, “Heedi yoó ibiidiyaaba hari mukaatimoo kilesi.”

Gi kaay sa ina tuba, Bere ugu ti Nanku Iliitleemu, hanguu kwahhade hhapeege. Daa handikimi tuba, “Iliitleemu ilafahhi malayika dosi, magu ga/ayri.”

Yu'udiyaa! Ana sugu qaw idadu hhanki gonkoinaa, bere ugu keeb'eeta pandaa dooii haa hanigi daareesida.


Da hhe'esi, Biriisimoo gugi mamay te'esii. Yu'udiyaa! Malayika yaagi khayri, haa gi tlaatlesiri ilia'aw ina.

Suti daa handikimi tuba, “Taataa Iliitleemu, Iliitleemu googu, hagu hhanti koisida.”


Sataanimoo, waaudi tiaa! Ma'aana daa handikimi taqay, “Ugu daareesi Taataa Iliitleemu, Iliitleemu googu, haa sugu yondite ina lenkosi kilesi.”

Da hhe'esi Yeesu gi ki/i hhapee da Galilaayage, tay hii haci /uuru gu Muuna gu Iliitleemu. Kara gimba gosi gii qoomi hari khisla hhapapu sliimaa gwaa ilaciyaa waaree.

Baloo da tamiige daa wana losona gu khaboo yaamu gu Kanaa da hhapee da Galilaayage da kooma omeeri.



Slime, Yeesu yaa wana te'esii, sliimaa haa iyoo dosi, haa sirakoomiisee dosi waka digaa kwahhasuusi losonakeesii gu khabooge.






Inkoo, tla/aā gu losonakeesii...

Difaaya hingii faakidi!

Idoo sangoo kaayiye ha ina, unkuray yondiida.



Hacimisa ma'ay sibeedoo hhakeesii haa slagwaw koko/o, leehhisa sa nankuay, ma kosi.



Ma'ay? Haā ti difaay! Difaay da hhoi!



Koisaka! Ugu hanti meesidi difaay da hhoi inkoo naqatloo!



?



Kahha dawaraa daqa losona gu khabooge da hīi gooy. Kahha arimaa ma'ay daa hiifooki gi difaay tleehhidiri.

Hīi naa gimba gu pandaa gu baka'asa Yeesu giyaa yondiidi, yade tongoo da Nasareetige!

Hīi ti miyaa?

Te'esii ina gi kaay sa inay tuba, "Ana kwanda ga kakaaru kawe Gimba gu Hhou gu Tawaaloo da Iliitleemu yaamu wakinayge see, sa gimba ana sinaa gimbakee ya/abi."



Peetiro inkoo, leehhisi masuwaa slagwiya naqatloo, lay taaree'eday makumbabuu kokuna.

Ti'ii Yeesu ginaa ilii leehhi sirakoomiisee dosi da pandaa.



Looimoo gu Goõ, haã yondiidani hari khisla amasi piray, haã oowaniiba ma samaakimoo lensee!



Inkoo, sa kaawaratee toku...





Inay yaati bakairi hari khisla! Yaa/imbiiriiba!






Looimoo gu Goō,
waaudi pandaa
dooaa, sa gimba
ana ti heedi gu
kooma
tlakwaroo!




Yeesu yaa ilakhookhoci
tongagu wa/a yade hhapee
da Galilaayage, tay tosaa
caacaahhamisi sinagoogagu
koinay haa gi kakaami Gimba gu
Hhou gu Tawaaloo da rawaa gu
raw. Kara, gi hhoemisi ga/ay
haa amaaiya paslaapasloo haa
gii ca/amisi gieeri tla/aã gu
hidage. Hida wa/a gugi sirakoniri
ina. Wakinay yaagi khayri
hhapapu wakinaygo, haa yaamu
gu didirigo gu Yerusaleemu
da hhapee da Israeeli. Inay gi
itatiisiri nara'a gimba sliimaa
giyaa kakaakane...



Digaa /aafi ha Iliileemu
hhaka'a gu koomee qori haa
wakhaa muunaï koinay, sa
gimba Iliileemu higimaa
ankhisi inay.



Dangwaa /aafi unkuray goó
gaiidee inkoo, sa gimba
asunkuilee maa
hha'aluumitay.



Dangwaa /aafi unkuray ha
Iliileemu qatlay dangumaa
ilii wahaahane ha hida, haa
dangumaa ilii laba'asiye
unkuray, haa dangumaa
iliitlohidiye ha inay gimba
paslaapasloo gu afa'afuuma
sa ana, sa gimba Iliileemu
sangu ilakhuukhuu'umisi
/aliya rawaa gu rawge.





Yondiida sa hida wakinay, nama amotee gooay unkuray goó iliisla'adee, inay ma yondiidiri sa unkuray.



Sla'a fa/ayaa dooguna haa firirima sa hhakee goó laba'asee unkuray.



Khu'uma hhanti yonditay gimba googuna gwaa tafau pandaa da hidage, ma danguma arimi ha hida.



Heedi goó yu'uda hadee gigi slahhaai, hīi hhe'esi, hīi gui haa ina muuna gosii.




Ilaa ti caa'asiya da slaqwa pahha. Bere ilaa koku guti hhoi, slaqwa doogu gonkosaa ti hacida cencee. Inkoo, bere ilaa koku gu tlakwi, slaqwa doogu sliimaa ti hacida hhantee.



Wanaaba yondimiisay goó hiidahhasa yondiida yondu sa looee cada.

Inkoo, hhanti tla'amuta sa gimba gu heetlaalee. Dabiida geesai Tawaaloo da Iliitleemu haa ibinaa dosi daa tafa'adi, ina sanguu roogisi idadu hhakee goó.



Qariqaaqari Yeesu gi kaay tuba, inkoo, heedi goó akhamisa gimba gooi haa gigi yondiidi, hikee ti heedika'a pahha gu kooma waaway, gwaa tleehhu mara gosi rawaa gu hhafidage. Heedi goó akhamisa gimba gooi, haa gi may yondiida gimbakee koi, ti heedika'a pahha gwaa bawdu gwaa tleehhu mara seehhinayge.

Baloo waka, Yeesu gi ki/i kara tongoo da Kaperinaumuge, hida giyaa ilii akhasiri yaagii kurunkuridiri haa gi niini/idiri mara giyaa iliiwane...

Inkoo, hida hhakee digiraa slanqadi hari dawaraa heedikee marage daqa Yeesuge, sa gimba gu raqatira da hida daa qiqincidi te'esii.

Da hhe'esi, gii dadayri rawaa gu pembeege, gi cihiri mucu daqatiray loii daa iliiwane Yeesu, gii /eetisiri heedikee gwaa tingara/uudu, tay hiĩ qaati falage.

Heediki siĩ so'oy taqay kaay?

Heediki hiĩ belendeqesi Iliitleemu.

Hhaku lensee gu kooma /uuru gu ilamooyiru tlakwaroo, Iliitleemu kilesi na kona!


Gimba haloo na slaahhi hari khisla, kaawaraa tuba, "Tlakwaroo doogu sliimaa dagaã ilamooyimi," baku kaawaraa tuba, "Tlayii, la waauta"?

Mala na wanta rawaa gu pembeege?

Yeesu giyaa ilii arimi hida hhakee konay /imbaraa da didiri daqa dosii, gi tosa kaay sa heedikee gwaa tingara/uudu tuba, ye nankoy, hanguu /atliside!

Tlakwaroo doogu sliimaa dagaã ilamooyimi!

Nanku Heedi kona /uuru gu ilamooyiru tlakwaroo da hida ti'ii koorotii! Te'esii Yeesu gi kaay sa heedikira gwaa tingara/uudu tuba, "Suguũ kaay, tlayii, oyii fala doogu, la waauta ayage!"




Hida sliimaa giyaa ilii aniri teesaaqay, gu lou yaa bakairi haa yaa tla'amuudiri hari khisla!

Da hhe'esi, heedikee gi kaay tuba, gu lou hiidahhasa khocu!

Hida gi kaayri tuba, yu'udiyaa hingii dahhasi khocu!

Da hhe'esi, Yeesu yaa waaudi te'esaa, gii guuma kay sinagoogige. Te'esii yaa wana heedi waku daba gosi gwaa tingara/uudu. Farisaayoo yaati khu'uu'unay Yeesu nara'a, ma slayri amoo dari sitaakiru. Inay gugi maasiri Yeesu tuba, ti kitlakuubaslii sariyaage hho'e'esa heedi baloo da Sabaato. Balotii da Sabaatoilee, daa kitlakuusi sumuku yondiida yondu sliimaa.



Te'esii yaa wana heedi waku daba gosi gwaa tingara/uudu. Ti kitlakuubaslii sariyaage hho'e'esa heedi baloo da Sabaatoilee?



Tafa'asi daba googu!



Cirakiray lenge dugugi hho'eesi sumuku!

Higi cira idara kayri sliimaa haa hida gwaa ilii'aa'awee mutemi Heroode, idoo gi ilii gaasiyee Yeesu.


Giyaadimiisee da Yerusaleemu kwanda sigi kaayye tuba, heediki hirigiyaadi hhapee doori daqa da tlakwige.



Da hhe'esi, Yeesu yaa hiiday masuwaage sliimaa haa sirakoomiisee dosi,
gi waaudiri haa gi toinaa hiicatiri hari tlawā da Galilaaya.






Looimoo gu Goō,
tlayii handi
ilabu'unte!




Sii so'oy tla'amuumutiri
teesaaqay? Unkuray inkoo
naqatloo ha kakhadaaai,
hakontaaiba /imba daqa dooii?








Te'esii yaa wana heedi daa ilii khaabaa'adi gieeri, tleemaa haã amasi see yaati maahhaahhamina yade ayisasuge haa omeerige.



Dayoodee!

Yeesu naykee yaa khoci!



Naina ti Yeesu!




Ye Yeesu, Nanku Iliitleemu gu Rawaa gu Idadu Sliimaage Waara, hani hhanti laba'asida ana!

Gieeri, ca/ii ttaa daqa heedikaa!






Uma googu na miyaa?

Uma goy na 'Legioni,' sa gimba dandiray ti raqa da didiri loi.




Hhooa handi ilafahhade, ma iliiguuma kayni biinota'a.

Yeesu gigi ilafahhi!






Caahha tuba, ana haatii /eetiiba rawaa gu rawgo, ma yondiidi gimba ga slae ana, ti sa yondu idoo da iliislaiye ha ina gunaa ya/abu.



Yeesu gi waaudi daqa daa hiicaaqutige daaba hida, ma firimi Iliitleemu.





Qariqaaqari, amasi hhakee gu firoo giyaa iliicatiri, Yeesu gii leehhi sirakoomiisee dosi mibi haa cada, sigigi qay /uuru gu tawaaloo sarii ca/amisuu gieeri daqa hidago haa sari hhoemisu ga/ay haa amaaiya goõ.


Umaĩ gu ya/abimiisetee gu mibi haa cada giyaa hiileehhi na nahhaã: Simooni (hiĩ daraa ayi uma gu caduu na Peetiro), Andareyaa hhia gosi gu Peetiro,

Yakoobo haa Yohaana ya'ay gu Sebedaayo,

Filiipo, Batolimaayo,



Toomaasi, Mataayo
karaanimo gu koodi,




Yakoobo nanku
Alifaayo, Tadaayo,



Simooni gu raqa da Seloote,
haa Yuuda Isikariyooti.



Heedika'a goó kwahhasuusa unkuray, ana
ginoó kwahhasuusi. Kara hikee goó
kwahhasuusa ana, ina yoó kwahhasuusi
Iliitleemu, gwaa ya/abu ana.



Ya/abimiisettee da mibi haa cada,
giyaa ilii hhe'esiri yondu gimba
sigaa kaay ha Yeesu, gi
hha'aluumidiri giyaa iliiki/iri yondu
gooinaa. Inay giyaa ilii hhe'esiri
gimbakee, Yeesu yaa slai wauda
haa inay daqa daa hiicaaqutige.
Teesaaqay see, raqoo gu hida yaa
slaiyaaiba sumuku geemawa inay.

Baruū gu bu'uru ti wa/a, yondimiisee
ti koko/o. Inkoo, firima Looay gu
qaymoo, ma ya/abi yondimiisee wa/a
qaymoo dosii.



Yeesu gi ilakoomi kakaaru haa hhoemisi ga/iidee dooina. Nama qatlaykee leë, dagii khwayauudi...

Filiipo gi kaay tuba, kaale kiriga kayna mukaatee, ma /agimisani hida hhanki? Unkuray sigoo caba hadisiday /agoo?

Ugu sla'adaa dandiray ma kiriga kayni mukaatee gu dinaari miyaa cada, ma hadisani sa hida hhanki goõ ma /aginiri.


Ti'ii wana khwaylimoo leë gu kooma mukaatee kooani haa samaakii cada gu digidaku. Gu lou, /agotee ti idoo mala daqa raqa da didirige taqaaqay!

Kaawa sa hida hhanki, ma ibiidiri raqoo gu hida mibeeri koakoani taqaaqay.

Yeesu gi daaresi Iliitleemu...

Hi haymisi sa sirakoomiisee dosi, inay ma hadimisiri sa hida hhakee.

Hida elefaaa gi /aginiri,
gi akhaakhaniri.



Hida yaa slaiyay oowakawa
ina hari /uuru, ma mutemi
gooina tleehhidi.




Gu lou, hii na Masiya,
Tletimiisaykira daa tletimi
tuba, yaa khay koorooqe!

Da hhe'esi, sirakoomiisee dosi
yaagii kurunkuriri fandakumay
gwaa meetu gu mukaatee haa
samaakii, gi hacimisiri kapapuu
mibi haa cada.



Cirakiray lenge, Yeesu gi kaay sa sirakoomiisee dosi, ma
hiiguniri masuwaage, ma giyaadiri sa ina hari bara da cadii da
tlawa da didiri da Galilaaya. Ina gi tosaa ilakhiinaa'adi onke
ina lenkosi, ma firoo kay Iliitleemu taysi.





Hida wakinay slaiyay hiiwaagisa Yeesu, ma mutemi tleehhidi. Inay konay iliipa'aru tuba, ina hiica/asi tawaaloo da Waruumi. Inay see goó kanimisee Yeesu, hingii roogidiri. Balalu sliimaa goóti ilakonay ilawaamisu ina. Inay gu slaiyay hiiguusa haa hida, magu gaasiri ina.

Yeesu gigi ilaki/isi inay tuba, gu lou, sangu kaay ambee, unkuray haniti damaamitaaiiba ana, sa gimba gaã antiri gimba gu baka'asa gaã yondiidi, ti sa gimba gaã /agintiri mukaatetira hagi akhakhantiri.

Maarimuu, ugu haani malaalee khaydi ti'ii?



Ana na mukaatimoo goó hadisa slafimaa sa hida. Ina gwaa khawa daqa dooii etaa arinaaba qori. Kara ina gu /imba ana etaa arinaaba wakhaa.

Heediki malee hiidahhasi hadisa slaqwa dosi sa dandiray maga /agini?

Caacaahhamisuki yaa karahhi! Ti miyaa gu hiidahhasa oowaraa?



Unkuray hhanti yonditay sa /agoo doó tlakwaakwawa, ba/ay hiti yondiida sa /agoo doó hiikaasa slafimaa gu koraraa haa koraraa goóba hiifaakoo.




Paaree waaudane.

Ina slai hiicora hida sliimaa.



Unkuray see haniti sla'adaaai mawaraa ana?

Looimoo gu Goó, ha daqa miyaa kayna? Ugu konta gimba guroó khawa slifimaa gu koraraa haa koraraa gooba hiifaakoo.




Kenga gu yaamu gu Yerusaleemuge hida digoóti niki cu/uduũ. Digoótii tluhhumisi, hiĩ na /agitiru gu gwaa'araa hari amoo da daribimaa gu Waruumi.



Bere heedi slai sirakoomiisay goy tleehhida, kwanda gi hiifookidiye gimba gosi giyoó slaiye sirakomamidu, haa geregediye musalaaba gosi, gi asu sirakona ana.



Heedi gu sla'a ilabu'uru ibinaa dosi, hikee ibinaa dosi higimaa hhamisi. Heedika'a gu hhamisa ibinaa dosi sa ana, hikee ibinaa dosi gimaa ilabu'una.



Ye hida gu Israeeli, kwanda ga cahhadee tuba, Iliitleemu ti leẽ kilesi.



Idoo da kaari ti Slae Taataa Iliitleemu, Iliitleemu googu, hari muuna googu goõ, hari ilahudaa koku goõ, hari waaway googu goõ.



Giyaa ilii day tongoo wakay hhapee da Israeelige, hingaa slaslay haa hida mibi, gwaa koomee ga/ay gu buubaa. Hida gwaa koomee ga/ayki, hingaa ilagaamaamisiyaaiba haa hida gwaaba ga/aykee.



Ga/iyydetee da buubaa kwanda gi maahhiyee daqa gi kayee, ma ilii/oo/iri hida wakinay tuba, inay yaa khociyay.

**Qadimida segenge!
Hida gu koomee
buuba yaa khociyay!**



Ye Yeesu, Looimoo gu Goō, sandi /awaarinte!





Unkuray, taa/amida hangu laqantee daqa hhapalooegee.



Hati hadakaynaa daqa hhapalooayge? Danditi laala/asakayaa?

Qariqaaqari danditi hhoesiyaa?

Cirakiray, leë gi ki/i daqa Yeesuge, tay tosaa daareemisi Iliitleemu hari afoo da didiri tuba, gu lou khociicima!

Dandii ilabusli buubaa doori.



?

Leë tla/aã gooinay giyaa ilii arimi duguũ hhoesii, cirakiray gi ki/i daqa Yeesuge, tay tosaa daareemisi Iliitleemu hari afoo da didiri.



Ina gi kaay tuba, Yu'udiyaa! Haã hhoay!

Hinti hida mibiibaslii dī ilabusli? Hari hhakira wakinay dagati kaanoki? Hhakuu waku tla/aã gooinaa dī arimi, gwaani ki/u sa daareesa Iliitleemu.



Kakaana tuba, Iliitleemu gu Hhou! /iisoo Taataa!



/imba doogu hīi hhoesidi ugu. Tlayii, taa/a waaudi. Slime, duguũ ilabu'umi ugu.

Giyaadimiisee da diini da Wayahuudi da Yerusaleemu yaa ya/abidi hida koina daqa Yeesuge, magu cangicangimisiri ina giyaa ilii hhiyumaamidiye. Inay yaa kanisiri sumuku yondu gosi.

Yeesu hingiti ilagaamaamisi haa hida goó yondiidee tlakwaroo da hida hhanki gooy slipalauusee, karaanimaii gu koodi goó yondiidee sa Waruumi.

Nanku Heedi, Masiya yaati khay ti'ii khoodoo, sa dabiidu haa ilabu'uru hida gu hamee tlakwaroo.




Sa gimba Yeesu yoó hhoemisi ga/iidee baloo da Sabaato see.

Hhoay!



Ina slai daaqay hari khisla...

Daaqay gu digidakwi maw yaa khayee daqa dooi, hagi hhanti tlaatlahasiday. Sa gimba Tawaaloo da Iliitleemu dati hida da hhakee gooy.



Yeesu dugwaa eteedi yade tongoo da Betaniyaage daa ilaciyaa waara haa yaamu gu Yerusaleemu. Ina sugugi kaay tuba, Lasaaro mama/i. Lasaaro sliimaa haa hhiee kosi cada, Maarita haa Mariyaa, yaati dene'ee gu Yeesu. Qatlay, Yeesu giyaa iliiday Betaniyaage, cirakiray gi akhasi tuba, Lasaaro duguū qaasi balalu cigahha hingii catiri.



Looimoo gu Goō, bere hanti wanta ti'ii, hhia goy hiī gwaaiyaaba.



Maarita, hhia googi yaa slafi ayisago.



Ana khua ina maa slafi yaagii ca/i ayisago sliimaa haa hida gwaa kaka/ee baloo da hiifaakooge.



Ana noó slafimisa hida haa sigigi hadimisa slafimaa. Heedi goó /imba ana, gimati gwaai see, ina hiti ibiidi. Haā /imbidi gimbaki?



Ee Looimoo gu Goō, haā /imbi ambee, ugu na Kristu, Nanku Iliitleemu, gwaa khawa ti'ii khoodooge.



Haguū kaale qaasidiri?


Looimoo gu Goō, khoca arimi.





Yu'udiyaa, idoo gwaa iliislaiye Lasaaro!

Yaa hiidahasii baslii tlaatlahasa Lasaaro, ma may gwaa'araa?



Aysasu hhakeesii tuueenaa digaati ilatagaagidi hari qayroo gu hhoi gu /abaakwi haa digigi qamidi aysasu daa hiikhuridige hhaafideerii gu maraooqe.

Surukusa tlaa/atee.




Looimoo gu Goō, inkoo hīi tlaatleesi tli/araa, sa gimba kona balalu cigahha aysage...

Bere ha /imbida ha anta wanqamee da Iliitleemu?



Inkoo ana hanti kaay gimbaki, sa raqati da hida dii qadimiti ti'ii, inay ma /imbiri tuba, ugu naa ana ya/abidi.



Lasaaro, ca/aayu tay khoodooqe!



Gweedakuna ma waaudi.

Hida gu deni goó tawaalimee Yerusaleemu digigi iliihaci tla'amee hari khisla sa Yeesu haa sirakoomiisee dosi.




Heediki yondimaamidi gimba wa/a gu baka'asa.

Bere hagu mayna ina ma ilakoomi yondu taqay, Waruumi yondiidiyay tlakwaroo daqa doorii.

Da hhe'esi, Waruumi yaa khayay gi hhamisiyay mara goori gu didiru gu Iliitleemu haa hhapee doori.

Ilahudeesa nara'a! Daraatii boo/i daqa doogunay heedi leë gwaa'araa sa hida, ba/ay da hhamisaraa hhapee goõ?




Haã na idoo, kwanda dugu gaasiye Yeesu.

Teesaaqay, tlaatleesoo da baloteesaago, giyaadimiisee da Wayahuudi yaa tlaatleesiri ilakhuukhu'umisu, idoo gu ilii taatahhiyee ina dabaii gu Waruumige, hhaã gwaa koomee /uuru gu gaasaraa Yeesu.

Namati qatlaykeesii, losona yaa wana tongoo da Betaniyaage...



Du/iya da tafu gu hhou haa da beyii dihhi.



Mariyaa!





Du/iyati danganti aloo hiidahhasi naadiru hari peesay wa/a, peesaykee dugugi hadimisi sa iliiawaraa kwaeeli.



Maw ilahufidu hadeti. Ina hintii tuutuqudi du/iyatee da kooma tafu gu hhou sa baloo da qaasaraa tuu'una dooi.

Balalu laho'o giyaa ilii kahhiyee sa dawaraa losona gu Pasaaka, raqoo gu hida gi hhiyuudiri yade Yerusaleemuge.



Heetlaalee dosii, raqa da didiri da hida daa khaydi losona gu Pasaakage, gi akhasidi tuba, Yeesu amooge wana, yaa khakhaakhay yaamu gu Yerusaleemuge.

Da hhe'esi, inay gii oyiri elemu gu khai doó tende oine, gii ca/iri sa amoodabaawa kawa Yeesu.



Gii ca/iri sa kwahhasuusa kawa Yeesu.

Kwahhasi!




Duguū /aafi ina gwaa khawa hari uma gu Taataa Iliitlemu!

Mutemi gu Israeeli!




De Yerusaleemu, bere hanti aloo caahhada letuti, gimba guroó khawa qasaw haa Iliitlemu, eki, inkoo duguū yakwi ilaa kokaa.



Yu'udaa! Dandiray hiidahhasanaaba idoo lensee.

Hida sliimaa guti sirakomaamidiyay ina!

Da hhe'esi, Yeesu gii day efeenaa da mara gu didiruge gu Iliitleemu. Hatee naa daqa daa iliifiriirine Wayahuudi.




Qatlay gu losona gu Pasaaka bee/u dugoó isooqtlidi.



Bee/ukee fu'umay kosi wakinay, digoóti hadimisi sadaaka mara gu didiruge sa hida digima ilagaasi daqa lenge haa Iliitleemu.



Inkoo, gu lou sadaaka mala da bee/imoo dii dahhasa bacaraa tlakwaroo da hida?




Te'esii, efeena da mara gu didiruge gu Iliitleemu, hida gi tlaatleesi naadiiduru, kirigiru haa alaalaaru gu peesay.




Cirakiray, Yeesu gigi iliica/i te'esii inay.






Mara goy duguti eteedina mara gu ilii firoo. Inkoo unkuray gwaatii fookidiri maraiya da fisiisee.



Inkoo inay yaa tla'amuudiri Yeesu tuba, heediki guti dihhu! Teesaaqay see, hida sliimaa yaa hha'aluumidiri hari khisla sa caacaahhamisu gosi goõ.



Gu lou, kwanda ga dabiidane amoo, magu gaasani ina.



Inay gi ilakhuukhu'usiri, idoo gi ilii ooyiyee Yeesu hari hhaaboo, magu gaasiri.

Teesaaqay see, hanti yondiidana gimbaki qatlay gu losona gu Pasaaka, hida yoo ba/atii /isinay khoslongora.



Bere ana hiilu/a Yeesu dabiï kokunay, unkuray sini mala hadisiday?

Hikee ti Yuuda Isikariyooti, leë gu sirakoomiisee mibi haa cada da Yeesu.




Ana hiilu/a Yeesu dabiï kokunay.



Inay sugugi kaayri tuba, sugu hadisana goboree mibeeri tami da feesa, bere hiilu/uda Yeesu dabiï kotii, idoo doó ilii kirigiye gooyay tongimoo leë.




Balotii daa ilikahhiye dawa losona gu Pasaaka, Yeesu gi kakaami sa hida mara gu didiruge gu Iliitleemu. Giyaadimiisee da deni gimati kooi'imisiyay see kanisaraa ina, ma may yondiida teesaaqay.



Hari khwayaïi hhakee, Yeesu haa ya/abimiisee dosi mibi haa cada hingigi slaslayri yaamuge, ma / aginiri sliimaa Losona gu Pasaaka.








Ana haã kwayruudi /agoo
Losona gu Pasaakaki sliimaa
haa unkuray, qatlay laba'asu
goy gi ilii kahhiye.

Unkuray ha khu'uday tuba, watemi
da hhapapu yoóti tawaalinay hida
koina hari /uuru. Unkuray hanti
teesaaqay laqaday.

Bere heedi waku tla/aã
googunay slai heedi gu didiru
tleehhida, kwanda gi tongimoo
googuna tleehhidiye.



Inkoo, ana hati waara
tla/aã googunay, hika'a
pahha goó yondiida.





Looimoo gu Gođ, ugu hati hhuncidaa ye'eeroo koi?
Suti, ugu hhuncidaaba ye'eeroo koi coko/o see!

Bere, ana hhuncaaba ye'eeroo koku,
ugu kontaaba ilagaasa haa ana.

Inkoo, bere ana, hanoóti eteedintay
Looimoo googuna haa Maarimuu googuna,
hoóti kaaday nara'a. Ana hanguu hhunci
unkuray ye'eeroo kokuna, slime unkuray
see hanguraa hiiboo/odiri hhuncidaa
ye'eeroo unkuray haa unkuray. Yondiida
nama teesaaqay gooy gaã ilii
yondiidi sa unkuray.



Looimoo gu Gođ, hhanti hhuncida
ye'eeroo koi kilesi, slime hhunci
dabaĩ koi haa saga gooi!

Heedi guũ
hhe'esu
hhuncidaa
slaqwa sliimaa,
yoóti slai kilesi
hhuncidaa
ye'eeroo.

Leẽ tla/aã googunay
hinii fookidi ana.


Ti ana goo?

Etaa!



Yuuda, idoo ga
sla'ade laqa,
laqaka ciraai!






Taqay lalaqa sa hiislaslaw goy.




Owaa /agima, haã na slaqwa doyi.



Kitahhama gonkokunaa hari qulu/uki. Haã na ceedee doyi da laqama ila/imbidu gu /abu, da tuutuquda sa hida wa/a, digima ilamooyimi tlakwaroo dooina.



Ana sangu hadisa ilakaawa da /abi. Hangu sla'aasla'adee unkuray haa unkuray, idoo hangwaa ilii slai gooy.



Bere unkuray hangu sla'aasla'aday, hida sliimaa caahhiyay tuba, unkuray ti sirakoomiisee doyi.



Looimoo gu Goõ, hagu sirakooma daqemoo goõ. Ana gwaa'araa see ha gwaa'a sa ugu!



Yeesu gi kaay sa Peetiro tuba, gu lou, sugu kaay ugu, hari amasi hanki gu letuti, konkaku giyoo ilii kahhiye ceearaa, ugu hanoo tlankida waa tami.

Qariqaaqari, hari khwayaii hhakee, Yeesu haa sirakoomiisee dosi, waaudiyay yaamu hhakeesaa. Yuuda wanaaba sllimaa haa inay.

Ana hangu maw. Teesaaqay see, Taataa sangwaa ya/abi Muuna gosi daqa doogunay. Hangu Iliiay haa ibiidi haa unkuray koraraa haa koraraa gooba hiifaakoo.

Unkuray ha khu'uday amoo dari dawaraa daqa ga kawe.

Ana na amoo, ana na gu lou, haa ana na slafimaa. Heedi hiidahhasiyaaba dawaraa daqa Taataage, bere hiicatiyaaba hari daqa dooi.

Ibiida ti'ii, ana ha hadakaw yaqay ma firoo kay Iliitleemu.

Ye Taataa goy, bere diidahhasi, sini surukuside qulu/uki gu laba'asu daqa dooa.

Teesaaqay see, hhanti yondita idoo ga iliislae ana, yondiidi idoo ga iliisla'ade ugu.



Unkuray hiidahhasidaaiibaslii guulimee ma saa leē see, qatlaykii gwaati karahhu taqay? Tlawaw! Yu'udiyaa, heedi gunii fookida ti'ii wana.



Hikee goo humba'ade na ina, oowakuna.



Maarimuu, hagu hhouu!

Yuuda, gu louu, hatiifookita Nanku Heedi hari humba'ada?



Looimoo gu Goō, hida hhanki hagi tlaaqanaa hari pangaaee koti?



Maw teesaaqay laqa!



Da hhe'esi, sirakoomiisee dosi goō gugi mayri ina, gi tooinaa lakidiri.

Yeesu dugugi leehhisi daqa hhapalooay gu didiruge, hīi gwaa heedi gu didiru gu giyaadimiisee goō da Wayahuudi. Peetiro haa Yohaana gugi sirakoniri seesegengo.



Peetiro gi day wa'ay gu efeenaa da hhapalooay gu didiru naqatloo.



Gu lou, heediki see hīi sliimaa wana haa Yeesu.



Igi de sagameeriya, ana haguti hhidima ina.

Ugu see ti leē tla/aā gooinay!



Heediki ana haguti hhidima!

Hiiye, gu lou, ugu ti dana'a gooina, sa gimba ugu see ti heedi gu Galilaaya.



Ugu hiiye, ana ti hhidima idoo ga giimaamisiide.





Qatlaykeesii loi loi, tay ina hiti kahhi gimbage, konkaku gi ceeti.



Looimoo gu Goõ, gii fookidi, gi yu'udi Peetiro.




Ye Kristo, aare tletimi, ti miyaa nungunii maahhasi?

Qatlay daa iliipisi, Yeesu duguraagi khay balasaa da didirige da gaduū gu Yahuudi. Hhappalooy gu didiru gi tlaatleesi maamisu Yeesu...



Inkoo, ugu na Nanku Iliitleemugo?

Unkuray nīi kaadiri tuba, ana na ina.



Yu'udaa hīi belendeqesi Iliitleemu. Hikee haraay boo/i gwaa'araa! May duguma hukumi ha Waruumi.

Inkoo, Yeesu dugugi leehhesi pandaa da gafana gu Waruumi na Pilaatu. Giyaadimiisee da Wayahuudi gi ilakutluhhiri hida gwaa khu'uu'umee. Inay gi maahhiri haa gii ca/asiri sitaakaa paslaapasloo.



Sa gimbakee haati khay koorotii, ana ma ilatlatlay sa hida gimba gu lou. Hida goõ guri bara da gimba gu lou waaree, hiniti akhaakhamisiyayi ana.

Inkoo, ugu hanti malee laqadi?



Gimba gu lou na mala?



Ugu hati mala kakaakanta sitaakatii goõ? Kontaabaslii gimba lensee gu ilaki/isa mutemi gu Wayahuudi?




Ana haã arimiiba dakoo lensee daqa heedikii haa hii ti Losona gu Pasaaka. Ha miyaa sla'aday, ana haguni afiooyima khiidimoogo? Baraaba haguni afiooyimaa baku Yeesu doó eteedine Kristu?





Baraaba.

Geemay Baraaba.



Inkoo, Yeesu doó eteedine Kristu, haguti malee laqa?

Dugwii tluhumisiye musalaabage!

Kara hingi eteediidina tuba, ina na Kristu, mutemi.

Bere heediki hagoo geemayda, ugu fa/aymoo gu Kaysaari tleehhita.



Ugu dugu geemay qadoo da mucu gosii.

Inkoo, Baraaba daa khiidimi jeerage, sa gimba yaa cu/i hida gwaa qwaqwatliitlimee haa sirikaarii da mutemi, dugugi geemay jeerago.



...,37, 38, 39!



Ana koomaaba dakoo haa ceedee da heediki.



Mutemi gu Wayahuudi hagu hhouu!



Yu'udaa! Heedi googuna nahii!

Dugwii tluhhumisiye musalaabage!

Dugwii tluhhumisiye musalaabage!

Dugwii tluhhumisiye musalaabage!



Pilaatu gii qaasi dugunimoo gu hukumuu gu gwaa'araa. Yeesu gi tosaa geregedi Musalaaba, hii na khooslimoo gu laba'asu, gii cati hari tongagu gu yaamu gu Yerusaleemu.



Daqa doó iliitluhhumisiye kenga gu yaamuge wanta. Daqatee dagoóti eteedina na "Faraa da Saga," hari gimba gu Eburaanisoo na "Goligoota."



Ti'ii sirikaarii yaa hiitluhhumisidi Yeesu musalaabage.




Qatlaykeesii lenge, Yuuda gwaa hiifookidu Yeesu, giyaa ilii arimi tuba, Yeesu duguū hukumi gwaa'araa, dugugi iliihaci wagaree.

Sa gimba handii fookidi heedi guba dakoo.


Gimbakee hindi mala ilii slai dandiray? Hikee ti gimba googu ugu loi.

Ana haā yondiidi tlakwaroo.



Qatlaykee, slime fisiisee cada digaay tluhumisi sliimaa haa Yeesu.


Ye Taataa, ilamooyimi hida hanki, sa gimba hiti hhidinay, idoo gi yondimaamidiyee.



Pilaatu gi ilafahhi dama handikimi handikaa bangasiyage, dagagii tluhhusi rawaa gu musalaaba gu Yeesuge. Bangasiyatee dagaati ilii handikimi tuba, "YEESU GU NASAREETI, MUTEMI GU WAYAHUUDI."



Te'esii, sirikaarimoo leē gi hadisi sa Yeesu difaay daay roogi haa kwacankha, ma kitahhi. Teesaaqay see, ina giyaa ilii kosi, gigi si'i kitahhu.



Hingigi deehhiniri qayroo kosi, hari amoo darii slakharaa kuura.



Gu lou, ina yaa ilabu'uu'umii baslii hida wakinay?

Bere, ugu na Nanku Iliitleemu, /eetaayuu musalaabago.



Ugu caba na Kristu? Hangu ilabu'unte ugu haā dandiray see!

Ugu hoó tla'amutaabaslii Iliitleemu. Dandiray haraatii boo/ani slawaraa hukumuki. Teesaaqay see, heediki yaa yondiidiiba gimba lensee gu tlaku.



Ye Yeesu, hanii slayde qatlay goo ilii daade daqa Tawaaloo dooguu.

Gu lou, sugu kaay ugu, letuti loi hoo sliimaa wanta haa ana Paradiisoge.



Inkoo, letu giyaa ilii daadi tana/iyage, hhantee yaa ilaslaabidi hhapee goō, saa dagati naqatloo da khwayaii.



Yeesu yaa arimi iyoo dosi te'esi haa Yohaana sirakoomiisay giyaa slaiye, hii qadimidiri ilaciyaa gu musalaabage.

Gi kaay sa iyoo dosi tuba, iyoo! Yu'udiyaa, hikee na nankoogi. Da hhe'esi, gi kaay sa sirakoomiisaykira tuba, yu'udiyaa! Hatee na iyoo doogu!



Iliitleemu goy, Iliitleemu goy, haniī so'oyi maydi?



Haā wakhiidi.




Ye Taataa, dabiī kokuu haā qaasi muuna goy.



Hii bu'udi.



Sirikaarimoo leë gi muti Yeesu
tluntlubaage hari labaala.
Cirakiray lenge ceedee haa
ma'ay yaagii ca/iri. Yeesu gi
afiimay saa daqati, letu giyaa
iliifuuru'uti.



Daa handikimi handikaa da
Iliitleemuge tuba, “Ina
duguraati giyaadi ha hida
ubee, bee/imoka'a pahha,
da gaasa kaye.”



Ina dugwaati muti haa
dugwaatii tlulhumisi
sa gimba gu tlakwaroo
doori haa dugwaati gaasi
sa tlakwaroo doori.




Ina na Masiya ga
baqaaqamidane mayaa
khay baku inaaba?



Paa ma firoo
kayni mutemi,
magu qaasani.



Yaamulooy gu yaamu gu Arimataaya, Yoseefu haa
Nikodeemu gii oyri tuu'unatee, gigi khiidini hari
kaeri gu qayru gu /abaaku poy, tay gigi maakhiri
hari du/iya da kooma tafu gu hhou, gi qaasa kayri
tuu'unatee da Yeesu te'esii.



Inkoo, baloo da Sabaato giyaa ilii catidi, daa iliipisi baloo da pandaa da kuiya, Mariyaa Magidaleena haa Mariyaa da cadii yaa waaudiri, gii yu'udakayri aysa da Yeesu.



Hida hhakira gi kaayri sa tigay hhakee tuba, so'oy damaamitay heedi gu slafa tla/aã gu tuueenaage? Hiĩ slafi aysago! Taa/amida kaawa sa ya/abimiisee dosi.



Gi yu'udiri taqay, gi aniri, tlaa/atira daa afa gu aysage waara hhaka, dagaã gwangwaraai, kenga gu aysage wanta.



Inkoo, ya/abimiisee dosi giyaa iliia khasiri gimbakee, Peetiro haa Yohaana gi tu/umidiri aysage.





Hida hiĩ baciri tuu'una da Looimoo gu Goõ, ana hhidima daqa giĩ iliqaasiri!



Gimba mala ningii ca/i?





Yu'udiyaa balotee loi, sirakoomiisee cada da Yeesu yaa hhiyumaamita tongoo waka khu'usa, daa eteediidine na Emaaw, tay hii simbariiqwaairi, hingigii gusaasidiri haa khocimiisay waku, tay inay tooinaa gimbuusiyay haa ina gimba gu gaasaraa da Yeesu.

Ye unkuray gu hhidimee, gwaa muunaaii hiilooa'awee /imbaraage gimba goo, daa kakaami ha tletimiisee da Iliitleemu! Caba yaati kwanda, Kristu dugu laba'asiye hari amotee. Da hhe'esi, ma hiiday wanqamee dosii da didirige? Gimbakee goo dugwaa Handikimi Handikaa da Iliitleemuge.



Qatlay Yeesu giyaa ilii ibiidi sliimaa haa inay meesaage, cirakiray, ina gii hhancooi ilaa koinaa.

Namati qatlaykeesii, cirakiray inay yaagi ki/iri Yerusaleemuge. Inay gi slayri sirakoomiisetira da mibi haa lee, hingii kurunkuridiri daqa lenge sliimaa haa hhakira gwaa waaree haa inay.

Inay gugi asu baraslayiri tuba, hii hinti Yeesu loi.

Gu lou, Looimoo gu Goo haguu arini, yaani slafi.

Slime, Mariyaa haa Peetiro see guu aniri!



Cirakiray...



Qasaw wane sliimaa haa unkuray.


Haã so'oyi tla'amutiri? Haã /imbidiriibaslii ti ana? Inkoo, unkuray arima dabaii koi haa ye'eeroo koi.

Ye! Looimoo goy haa Iliitleemu goy!




Balalu mibeeri cigahhage gii caca/i daqa ya/abimiisee dosii, gi kakaami sa inay gimba gu Tawaaloo da Iliitleemu. Slime, hingigi slaslay haa raqa da hida miyaa kooani. Letu waka gi slay ya/abimiisee dosi ooyinta samaakii tlawu da didirige da Galilaaya...





Simooni, nanku Yohaana, gu lou ugu hani sla'adaa, ba/ay da danaee hanki koku?




Ina gugi kara maasi waa da tamii, kakaana tuba, Simooni, nanku Yohaana, hani sla'adaa?



Gu lou, Ye, Looimoo gu Goõ, ugu khu'uda tuba, hagu sla'a.

/agimisi bee/u goy.



Na sirakonte!

Siniĩ hadisi /uuru goõ gu tawaaloo, rawaa gu rawge haa koorooqe. Teesaaqay, taa/amida /isima hida gu hhapapu goõ, ma sirakoomiisee doyi tleehhidiri, hagigii nunqudimisiday hari uma gu Taataa, haa gu Naw haa gu Muuna gu Iliitleemu. Slime, caacaahhamisakina ma ooyiri ilakaawa goõ, sangwaa kaay unkuray.



Gu lou, slawaw, ana sliimaa waara haa unkuray balalu sliimaa, hiifaakoo da kooroo naqatloo.

Qariqaaqari giyaa ilii hhe'esi kaawa gimbaki, tay gi tooinaa khu'unay, dugurigi tosaa waaudi rawaa gu rawge ha Iliitleemu. Nama Yeesuki leẽ, slime hiĩ kaay tuba, yaa ki/i koorotii sa hukuruu gu hida goõ.


Yeesu duguraa iliwaaudi rawaa gu rawge, ya/abimiisee dosi gi baqati yaamu gu Yerusaleemuge, tay tooinaa firiirina Yiliileemu. Muuna gu Iliileemu yaagii /eeti haa gii guumi muunaï koinay. Nama Muunakee leë gwaa wa'ay gu Yeesuge waara, slime yoó wa'ay koinay ibiidi haa daqa hhaka'ay goó /imbee ina. Muunakee giyoótii /abeesi inay, ma hida gu /abi tleehhidiri, hhaã gu koomee /uuru gu ilatlatlaw Yeesu.

Ye hida itatiisa, gwaa'aratee see yaa hiidahhasidiiba oowaraa Yeesu aysage. Iliileemu yaa hiiki/isi slafimaa kosi. Iliileemu gwaa /isimi ina, ma Looimoo gu looe tleehhidi.



Ya/abimiisee da Yeesu yoóti hadakayda daqemoo goó khorotii, doómati waari see kanimisu gu dihhu.

Yeesu ti Nanku Iliileemu!



Gimbaki gu hhou slime dugwaati kakaami hari amoo da handikiikiru cheetatu.

Kristu, ina loi, yaa hiioy tlakwaroo doori goó slaqwa dosii rawaa gu musalaabage, ma gwaai sa tlakwaroo doori. Ina yaa teesaaqay laqi, dandiray mangi mamayni haa tlakwaroo sumuku haa ma ibiidani, ibinaa daa tafa'adi pandaa da Iliileemuge. Hari amoo da difoo gosi unkuray dangwaa hhoeesi.



Inkoo, ya/abimiisee da Yeesu khoroo sliimaa hingoóti slaslayay haa gi firinay Iliileemu daqa lenge. Slime, inay yoóti sominay Bibliyaa. Kara, inay yoóti fandakumisiyay mukaatee haa hingigi warii hadimisiyay qulu/uu gu difaay. Hatee ti amoo darii slaslaw gwaa'araa da Yeesu. Ti kwayru gu Iliileemu arimaa inay haa dene'ee koina hingi sla'aaslayay, sla'amuu gu Iliileemuge gu wa'ay koinay waara.

Yeesu yaa /isimi hida, ma
hiigaasiri piimaa da Iliitleemu.



Yeesu hindi slai
dandiray! Kaay /iisoo
haa firiirimi ina kilesi!



Iliitleemu yaa slai hida gu khoroo, ina
yaati amoolaa hadisi Nankosi gu leë, kila
heedi goó /imba ina, ma may hhama, ina
hiti slaye slafimaa gu koraraa haa
koraraa goóba hiifaakoo.

WILLEM DE VINK

BIBILIYAA

Catimisu gu Yeesu ti hiislaslaw Bibiliyaage. Kitaabuu lensee hhaku daa somimi haa doó somine inkotii, waa wa/a ba/ay da Bibiliyaa. Ti kitaabuu gwaa hacu kitaababaa. Handikaa da kitaababati goõ yaa hiioodi koraraa elefu leë haa miyaa kooani (1500). Handikuru gu Bibiliyaa yaati bu'udi koraraa elefu leë haa miyaa dagati (1900) gwaa hiicatee. Bibiliyaa yoóti ilagaasida catimisu goõ, idoo Iliitleemu hingaa iliitlaa'asi ibinaa da hidage. Catimisu gu Yeesu yoóti laqana Iliitleemu na miyaa.


CATIMISU GU IBINAA DA YEESU

Bibiliyaa yoóti ilagaasida kitaababaa cigahha (4) doó ilakeesa ibinaa da Yeesu. Kitaababati dagaati u'umi sirakooma da umaĩ gu hida gwaa handikimee. Hida hhanki gwaa handikimee yaa ibiidiri qatlay gu Yeesu.

1. **Mataayo** - Sirakoomiisay gu Yeesu. Ina yaati yondimiisay gu hiikurunkururu gu koodi. Ina yaa ilakeesi, idoo Yeesu giyaa ilii yondiidi haa hida gu Israeeli (Wayahuudi).

2. **Maariko** - yaa kahhi qaraimoo qatlay Yeesu giyaa ilii yondimaamidiye. Ina yaa handikimi koko/o gimba gu baka'asa daa yondiidi Yeesu.

3. **Luuka** - yaa dereesimoo. Ina loi, gwaa hhidina Yeesu. Luuka yaa ilakeesi, idoo Yeesu giyaa ilii yondiidi haa hida.



4. **Yohaana** - ina slime yaa sirakoomiisay gu Yeesu. Ina yaa laqami loi Yeesu na miyaa. Yeesu ti Iliitleemu hĩ gwaa heedi, ma afigweedi hida tlakwaroo dooinaa.

HIIDAWARAA DA YEESU

Iyoo dosi Yeesu, Mariyaa, dagaa kahhi khaboo, qatlay Yeesu dugwaa iliiday. Mariyaa yaa kahhada kikito'oo. Iliitleemu yaa ilakhuukhu'usi tuba, Yeesu dugu hiidaye. Gimbakee gu baka'asa dugwaa kakaami kitaababaa da waka'aleege daa iliikahhiye qatlay gu Yeesu. Yeesu dugwaa hiidayiiba khamaslu pahha baku heedi gu kaaru pahha. Ina dugwaatii dayi daqa doó ilii /agine yakway, sa gimba daqa yaa wantaaba mara gu iliigu'udeege dahha.

GIMBA GU BAKA'ASA GU YEESU

Yeesu yaa laqaaqami gimba gosi wa/a gu baka'asa. Bibiliyaa yoó u'unta ina yaa hhoemisi hida hiicataraa da waa mibeeri cigahha (40). Hari amoo da gimba gu baka'asa, Yeesu yaa laqami /uuru gu Iliitleemu haa sla'amuu gosi. Ina yaa laqami tuba, Iliitleemu slai iliiawa hida haa gi ibiidiyay hari hha'alloo.



GWAA'ARAA DA YEESU HAA SLAFARAA DOSI AYSAGO



Yeesu yaa so'oy gwaai? Ilakeesa dosi wanta Bibiliyaage.

Qatlay waku, hida goõ hoóti dakumisana. Gimba goóba muunaboo/eesa Iliitleemu haa gimbakee gi slahhaa'asi baku Muuna tlakweesi. Gimbakee dugoóti eteedi na tlakwaroo. Tlakwaroo goõ yoó hiidahhasida kanisa hida, ma mayri dene'ee gu Iliitleemu tleehhida. Hatee na idoo saa khay Yeesu. Hari amoo dosi hingaa hiica/asi Yeesu, ina loi yaa hiiy /agitiru gu tlakwaroo doori. /agitirukee yaati gwaa'araa. Tlaatleesi, qatlay Yeesu giyaa ilii gwaai sa dandiray, hiidahhasana dene'ee gu Iliitleemu tleehhida. Teesaaqay see, kwanda ga firine ilamooyiru sa dakoo gaa yondiidani daqa Iliitleemuge.

Yeesu yaa slafi gwaa'araago. Iliitleemu gwaa slafisi kara. Hari yonduki, Iliitleemu sindaa laqami tuba, ina kona /uuru ba/ay da gwaa'araa. Inkoo, Yeesu yoó sliimaa ibiidi haa Iliitleemu. Haa sa gimba ina ti slafi, balalu sliimaa hiidahhasi dana'a goori tleehhida. Ina hinditi slai iliiawa dandiray, ma ibiidani amamu gu muunaboo/eesage Iliitleemu.

FIROO

Bere, hiifookita gi /imbida pandaa da Iliitleemuge dakoo gaa yonditi haa bere sla'ada dana'a gu Iliitleemu tleehhida, hiidahhasida firoo, firoo da haã gooy:
“Iliitleemu gu kooma sla'amuu, ugu hani sla'ada.

Yeesu hagwaa ya/abidi, Nankoogu gu leẽ.

Ina yaa gwaai musalaabage sa dakoo dooy goõ gaa yondiidi.

Haã firimi hani ilamooyinte dakoo dooy gaa yondiidi. Haa dakusi, hani ilamooyinte.

/iisoo tuba, Yeesu hari bara dooy wana.

Balalu sliimaa, hati sla'a ma heedi googu tleehhidi.

Haã firimi, hani iliiayde, ma ibiidi ibidinaa ga sla'ade ana, ma ibiidi.

Balalu sliimaa ilaciyaa koi ibiidi.

/iisoo sa ilaki/isa da firoo dooy.

Ugu hoó yondita kila idoo goó hiifadite!”

YEESU HAA UGU

Catimisu gu Yeesu kona hiifaakoo da cenceege waara. Yeesu yaati dana'a gu hida wa/a hari khisla, inkoo naqatloo. Khooroo hingii fookiti. Hida wa/a yoó hhiyuudiyaiiba hari daqwaai baku hari faraasi, teesaaqay yoóti hhiyuudiyay hari gaararuu haa hari cira/a/u. Teesaaqay see, gimbaki yoó pasloo tleehhidiyaaba daqa Yeesuge. Ina yoóti sliimaa wana haa dandiray, giyaa ilikhookhociicine gooay Israeelige. Ina dugoó anaaba, teesaaqay see, ina guti lou. Ina hiti slai dana'a googu tleehhida letuti. Itatiisaku hagu dahhasida sla'araa ina.

Inkoo, ugu baku igi hagu sla'adaa caahharaa hari kisla Yeesu haa ibinaa dosi? Hiidahhasida yondiida gimbaki:

1. Tlaatleesi somaa Bibiliyaa ugu loi

(Hari ilaslaaslaqasa: tlaatleesi somaa kitaabuu daa handikimi ha Luuka).

2. Tlaatleesi firoo

(Cocoi haa Iliitleemu haa itatiisaku ina -gimba nama gimba cocoi ti gimba gu kaaruuba duguni slai guni coco'oda).

3. Cocoi haa hida wakinay gimba gu Yeesu haa gimba gu Bibiliyaa.

Yeesu hiti slai sirakoomiisee dosi mangi slaslayri sliimaa haa hangugi muuna hii/atlisiyay haa hangugi caacaahhamisiyay hari khisla.

Text and illustrations: Willem de Vink

Copyright © 1993 Stichting Wereldtaal, Houten, The Netherlands.

Published in Dutch as "Jezus Messias".

Edition in Burunge (Tanzania) © 2021

Digital copyright under the terms of the Creative Commons BY-SA license.

All rights of translation, reproduction and adaptation reserved for all countries.

e-mail: jmpbk.app@gmail.com

<https://www.jesusmessiahcomicmedia.com/tanzania>

YEESU MASIYA. Hĩ na catimisu gu lou gu Yeesu Masiya. Ina yaa ibiidi koraraa elefu cada gwaa hiicatee hhapee da Israeelige. Kila heedi gungaa slaslaw haa ina gwaati baka'asi hari yondu gosi. Hhaku heedi gwaa yondiidu da ina gooay.



*Gimba gu gimbuusa: BURUNGAISOO
Language: Burunge (Tanzania)
ISBN: 978-94-93178-23-6*